



**KENYATAAN MEDIA**  
**MENTERI SUMBER ASLI DAN ALAM SEKITAR**  
**KEMENTERIAN SUMBER ASLI DAN ALAM SEKITAR (NRE)**

**DIKELUARKAN PADA: 29 OKTOBER 2015 (KHAMIS)**

**STATUS KUALITI UDARA**

Pada 29 Oktober 2015 (Khamis), bacaan Indeks Pencemar Udara (IPU) yang direkodkan pada jam **4.00 petang** menunjukkan 42 kawasan mencatatkan status kualiti udara pada tahap baik dan 10 kawasan mencatatkan status kualiti udara pada tahap sederhana dan tiada kawasan mencatat status kualiti udara tidak sihat.

Bacaan IPU terkini setiap jam boleh dirujuk di laman web Jabatan Alam Sekitar (JAS) di alamat url, <http://apims.doe.gov.my/v2/> atau dengan memuat turun aplikasi telefon pintar rasmi MyIPU di 'Google Play' atau 'App Store'.

**Hari ini status kualiti udara secara keseluruhan bertambah baik disebabkan Monsun Timur Laut atau Musim Tengkujuh telah bermula di Malaysia dengan kebanyakan tempat mengalami hujan lebat yang telah mengurangkan jerebu dalam negara.**

**BILANGAN TITIK PANAS (HOTSPOT)**

Berdasarkan laporan oleh *ASEAN Specialised Meteorological Centre (ASMC)* yang berpusat di Singapura pada 28 Oktober 2015, imej satelit *National Oceanic and Atmospheric Administration (NOAA)* 18, 3 titik panas (hotspot) dikesan di Sumatera, Indonesia manakala di Kalimantan 43 titik panas (hotspot) dikesan. Hal ini kerana cerapan satelit tidak menyeluruh dan diliputi oleh awan. Di dalam negara pula 1 titik panas (hotspot) dikesan iaitu di Negeri Sarawak.

Peta Jerebu Serantau yang dikeluarkan oleh *ASMC* pada 28 Oktober 2015 adalah seperti di **Rajah 1**. Berdasarkan peta tersebut, lingkaran asap jerebu dari Sumatera bercantum dengan jerebu dari Kalimantan bergerak ke arah barat menuju ke Lautan Hindi

## **TINDAKAN DI PERINGKAT SERANTAU**

**YB Menteri Sumber Asli dan Alam Sekitar (NRE)** telah menghadiri Mesyuarat Ke-11 ‘Conference of Parties to the ASEAN Agreement on Transboundary Haze Pollution’ pada 28 Oktober 2015 di Hanoi, Viet Nam, yang merupakan mesyuarat pertama semenjak ke semua Negara anggota ASEAN meratifikasi Perjanjian. Di dalam Mesyuarat tersebut **YB Menteri NRE** telah dilantik sebagai Naib Pengerusi. Malaysia terus menggesa negara ASEAN untuk meningkatkan tindakan penguatkuasaan terhadap pesalah yang menyebabkan jerebu serantau. Malaysia juga menggesa Ketua Negara ASEAN berusaha ke arah langkah penyelesaian yang konkrit dan bersepadu serta berterusan mengambil langkah pencegahan kebakaran tanah dan hutan. Malaysia juga menyeru supaya negara ASEAN berkerjasama rapat dalam meningkatkan keupayaan kapasiti dan pengetahuan teknikal daalam menangani masalah pencemaran jerebu merentas sempadan.

Satu delegasi Malaysia yang dianggotai oleh **YB Dato Sri Dr. Haji Wan Junaidi bin Tuanku Jaafar**, Menteri Sumber Asli dan Alam Sekitar, Malaysia telah bertemu dengan Menteri Lingkungan Hidup dan Kehutanan Indonesia, Ibu Siti Nurbaya Bakar bagi membincangkan isu jerebu merentas sempadan dan kerjasama dua hala antara kedua negara pada 27 Oktober 2015 di Jakarta, Indonesia.

## **TINDAKAN TERKINI DI PERINGKAT TEMPATAN**

Jabatan Alam Sekitar (JAS), NRE berterusan memantau rapi bacaan IPU di seluruh negara melalui 52 stesen pengawasan kualiti udaranya. Mekanisme tindak balas (*response mechanism*) semasa berlakunya jerebu adalah mengikut **Pelan Tindakan Jerebu**

**Kebangsaan** di mana tindakan terkini adalah pembenihan awan oleh Pihak Meteorologi Malaysia yang telah dijalankan mulai 22 Oktober 2015.

## **TINDAKAN PENGUATKUASAAN KE ATAS AKTIVITI PEMBAKARAN TERBUKA**

Berdasarkan siasatan oleh Jabatan Alam Sekitar (JAS) pada tahun ini sehingga 28 Oktober 2015, sebanyak 3,591 kes pembakaran terbuka telah dikesan di seluruh negara iaitu pembakaran terbuka melibatkan kawasan hutan (603 kes), kawasan pertanian (1216 kes), kawasan industri (21 kes), kawasan pembinaan (82 kes), tapak pelupusan sampah (97 kes), kawasan belukar (694 kes) dan lain-lain pembakaran terbuka kecil (878).

Bagi tempoh yang sama, sebanyak 229 kes pembakaran terbuka telah dikenakan tindakan kompaun dan 16 kes telah dikeluarkan Notis Arahan dan 42 kes telah dikeluarkan Surat Arahan. Selain itu, sebanyak 23 kes pembakaran terbuka telah disediakan kertas siasatan untuk diambil tindakan mahkamah.

## **NASIHAT KEPADA ORANG AWAM**

Semua pihak dinasihatkan agar tidak melakukan pembakaran terbuka atau membiarkan tanah atau premis kepunyaan mereka dimasuki atau dicerobohi oleh pihak-pihak yang tidak bertanggungjawab sehingga menyebabkan pembakaran terbuka untuk tujuan tertentu atau dengan tidak sengaja.

Orang ramai juga diminta bekerjasama untuk memadam kebakaran-kebakaran kecil dan juga melaporkan kes-kes pembakaran terbuka atau kebakaran kepada Jabatan Perkhidmatan Bomba dan Penyelamat di talian **999** dan Jabatan Alam Sekitar (JAS) di talian bebas tol, **1-800-88-2727**.

Semasa keadaan berjerebu, orang ramai dinasihatkan untuk mengambil langkah berjaga-jaga dengan mengelakkan dari berada di luar rumah, mengurangkan aktiviti riadah luar dan sekiranya perlu berada di luar hendaklah memakai penutup hidung dan mulut (mask) serta mendapatkan nasihat kesihatan dengan melayari laman web Kementerian Kesihatan Malaysia (KKM) di alamat <http://www.infosihat.gov.my>.


# KEMENTERIAN SUMBER ASLI DAN ALAM SEKITAR

29 Oktober 2015

RAJAH 1

## PETA JEREBU SERANTAU, 28 OKTOBER 2015

(Sumber : ASEAN Specialised Meteorological Centre, Singapura)



### **Regional Haze Update**

Scattered showers in the near-equatorial region have reduced the extent of haze area in Sumatra and Kalimantan. Some smoke haze continued to be observed over the sea areas between Sumatra and Kalimantan. Several smoke plumes were visible in South Sumatra and central Kalimantan.

Updated 7:46 PM 28 Oct